



UPA2019/165

9/4-2019

Randi Vestergaard Evaldsen

Qasigiannguit Aasiaallu akornanni erngup nukiganik nukissiorfiliorsinnaanissaq anguniarlugu aalajangiinissamut tunngavigisassamik Naalakkersuisut UKA19 nallertinnagu saqqummiusseqqullugit peqquneqarnissaannik Inatsisartut aalajangiiffigisassaattut siunnersuut. Aalajangiinissamut tunngavissaliornermi ilanngullugu erngup nukiganik nukissiorfiliassap qanittuaniiittut illoqarfiiut nunaqarfiiillu sorliit ilanngunneqarsinnaanissaat naliliiffigineqarsimassaaq taavalu nukissiutinut ataavartunut assigiinngitsunut Igalko-mi misilittanermi paasisat atorneqarsinnaanersut ilanngullugit nassiuasiuunneqassallutik.

(Inatsisartunut ilaasortaq Aqqa Samuelsen, Inuit Ataqatigiit)

(Siullermearneqarnera)

Siullermik naqqissuserusuppara Demokraatini isumaqaratta nukissiuutinik atuinerput sapinngisamik mingutsitsinikinnerpaamik tunngaveqassasoq. Pingaaruteqarpoq nunatta avammut nittarsaassinnanissa nunatut silap pissusaanut ataaqqinnittutut aamma mingutsitsinngittunik nukissiuteqartutut. Taamaattumik pingaaruteqarpoq tamakkiisumik isiginnittuartarnissarput nukimmik pilersuineq eqqartortillugu. Iluaquataanngilaq uani siunnersuutigineqartutut nunap ilaannaralaangua kisiat isigniartassagutsigu.

Qularutissaanngilaq pisinnaasoq pisartussarlu silatta pissusaanut avatangiisitsinnullu iluaquataalluarsinnaasut tamatta ataatsimut akisussaaqtigikkut. Tamatta suleqataasariaqarpugut tamatta nuarsuatta peqqinnarnerulernissaanut, toqqisisimanarnerulernissaanut aamma piujuaanartitsineq tunngavigalugu inuuffiginissaanut. Pisussat pisariitsuaqqat eqqartorpagut, soorlu angerlarsimaffitsinni akisussaaffimmik tigunissarput aamma pinngortitami. Naalagaaffit Peqatigiit nunarsuarmi anguniagaasa 17-at naapertorlugu politikkikut arlalinnik isummersuuteqareerpugut. Nalunngnilara kommunini sumiiffit ilaanni immikkoortuni iluaqtissarsivigineqarsinnaasumik piviusunngortitsisoqareernikuusoq - aamma upperaara tamanna pillugu nuna tamakkerlugu politikkikut amerlanerusunik isumaliutersuuteqartariaqartugut.

Naatsumik oqaatigalugu oqarsinnaavugut Demokraatini ataavartumik nukissiuutit pingaartitorujussuugigut. Nunamut iluaqutaavoq peqqinnarlunilu kisianni sualummik nunarsuatsinnut aamma. Nunatsinni ullumikkut nukiup pilersinnejartartup 73 procentia ataavartumik nukissiuutineerpoq. Uanga upperaara suli annertunerusinnaasoq suli. Tamanna angusinnaavarput piviusorsiortunik anguniagaqarnitsigut aallaavigalugu pilersaaret atasinnaasoq aaqqissuulluagarlu, tassunga atatillugu uangut politikerit anguniartariaqarparput sapinngisamik amerlanerpaat isumaqatigiissuteqartarnissaat, tamanna tamatta soqutigisariaqaratsigu. Nunatsinni erngup nukinga atorlugu nukissiuutit assersuutissaapput kusanariaqqiffissaqanngitsumik aqqutissaq eqqortoq atoripput. Taakku aqqutigalugit uppennarsarsinnaavarput, heavy fuelimik eqqussuinermut malunnartumik appartissinnaagipput.



Nalunngilara kingullertigut arlalinnik misissuisoqarnikuusoq assersuutigalugu Nukissiorfiit projektinut tunngaviit nutarternikuuat, tassanilu uppermarsarneqarpoq Aasiaat, Qasigiannguit, Ikamiat aamma Akunnaap nukissiutinik ataavartunik pilersorneqarnissaat periarfissaqarluartoq. Aamma ilanngullugu misissorneqarpoq immaqa naqqatigoortut kabelit atorneqarsinnaanersut nunatami Ramasarimi portusoorsuarnik napparusiornissaq pinngitsoortinniarlugu. Niuernermut tunngavigineqarpoq atuinerup innaallagissamik kissarnermut ikaarsaarnissaa. Aamma periarfissaavoq. Tamarmik 1,2 mia. koruunik akeqartussatut tagginneqarput. Aamma anorisaatit seqernullu qinngorneri iluaqtigalugit assiganik nukinnik pilersitsisoqarsinnaanersoq misissorneqarnikuovoq, tamannali ajornarlunnassasoq paasineqarluni, 50 procentit taamaallaat pilersorneqarsinnaasut paasineqarsimammatt.

Akikinnerugaluarpoq kisianni sunniutissai ajornerullutik. Aamma inuiaqtigii aningaasarsiornerannut qanoq kinguneqarsinnaaneri naatsorsorneqarnikuupput, tassani aamma naatsorsorneqarlutik aningaasaliissutit taarsersornissaannut piffissaq atorneqartussaq il.il. Tamanna tunngavigalugu isumaqarpunga pitsasumik casemik peqareerluta. Apeqqutaagunaporli sumut killissimanersugut aamma misissuinigut tunngavilersuinigullu ingerlatiinnassanerigut sulilu aningaasat amerlanerusut misissuinernut siunnersuisartunullu atossanerigut taakkununnga misissortillugit misissorneqareersut?

Isumaqarpunga pissusissamisuussasoq ataatsimoortumik pilersaarusrifigineqartuuppat Naalakkersuisoqarfiup Nukissiorfiillu qanoq nukissorfiliassat aningaasalersornissaat isigineraat. Kisianni aallaquaataani oqareernittut, iluaqutaanngilaq immikkoortoq pisarput isigissagutsigu najukkani pisariaqartitsineq kisiat aallaavigalugu - suna tamaat ataatsimut isigisariaqarparput.

Taamatut oqaaseqarlunga inuussutissarsiornermut ataatsimiisitaliamut innersuuppara, tassani misissorneqaqqullugu killiffissioqqullugulu una suliaq.